

Месяца августа в 10-й день

Собор новомучеников и исповедников Соловецких

На велицей вечерни

На Господи, воззвах: стихиры праздника и святых, глас 1:

Приидите, вернии,/ хвалу воздадим собору новомучеников,/ за Христа на островех Соловецких пострадавших,/ веру же истинную до конца сохранивших./ Тии бо, муки велия претерпевше,/ на Небесех ныне наслаждаются радости неизреченныя,/ Соловецтей земли явльшеся сокровище безценное/ и миру всему проповедание покаяния.

Первым мучеником за Христа уподобистесь,/ страсотерпцы соловецтии:/ тии бо гонения и мучения/ от язык нечестивых и зловерных претерпеваху./ Вы же страдания и смерть/ от богоотступник страны нашае приясте,/ не убоявшеся мучителей, тела ваша терзающих,/ душ же не могущих убити:/ тем вечныя жизни сподобистесь/ и со всеми святыми упокоения.

Узницы незлобвии священнии,/ вы, поругание и истязания претерпевше,/ любве ради божественныя не устрашитесь смерти лютыя./ Злобы же не имуще о убийцах ваших,/ тех озлоблению и беззаконием просисте оставления/ и, крест мученический на себе кротце подъемше,/ преподобным отцем соловецким приложистесь.

Что нищета и скорби наша,/ с верою мученицы вопияху?/ Что болезни и муки от человек бываемыя,/ силе божественней вся преодолевающей?/ Во Христе бо распеншемся за ны и воскресшем/ крепость наша, живот и упование,/ умерщвляеми Его ради Царствие Божие обретаем.

Слава, глас 6:

Приидите, вернии,/ возславим новомученики и исповедники соловецкия,/ иже многообразная страдания претерпеша:/ крова отеческаго лишение,/ со други и сродники разлучение,/ в темницы мрачныя заточение,/ от глада и хлада истощание,/ от тяжких работ изнеможение,/ и иная всякая изнурения и муки./ Обаче, силою Божию укрепляеми,/ ярость демонскую низложиша/ и от скорби смертныя к блаженству райскому востекоша./ Темже к ним с любовью возопиим:/ яко велие имуще дерзновение ко Господу,/ молитесь спастися душам нашим.

И ныне, праздника, глас тойже:

Прообразуя воскресение Твое, Христе Боже,/ тогда поят три Твоя ученики,/ Петра, и Иакова, и Иоанна,/ на Фавор возшел еси./ Тебе же, Спасе, преобразующуся,/ Фаворская гора светом покрывашеся,/ ученицы Твои, Слове,/ повергоша себе долу на земли,/ не терпяще зрети невидимаго зрака,/ Ангели служаху страхом и трепетом,/ небеса убояшася,/ земля вострепета,/ видяще на земли славы Господа.

Вход. Прокимен дне. И чтения мученическая.

На литии стихира храма и святым, глас 8.

Подобен: О, преславнаго чудесе:

О, лютыя злобы нечестивых!/ Обитель соловецкая, прежде многославная,/ темница бывает/ и благолепныя доброты лишается,/ бесчестию и поруганию предается/ и нечестивыми разоряется./ Обаче страдания новомученик/ паки освящается и украшается/и благовествует славу крестную.

Слава, глас 4:

Вас, соловецтии новомученицы,/ лютае мучения претерпевшыя/ и силою Христовою бесовскую гордыню низложившыя,/ от скорби смертныя к блаженству райскому востекшыя/ и дерзновение велие к Богу имущыя:/ мы, немощнии братия ваши,/ страдания и подвиги ваша почитающе,/

немолчными усты прославляем и тако взываем:/ оградите нас от напастей и злоухищрений вражиих/ и помощь свыше подавайте,/ во еже веру Христову нам непорочно сохранити/ и в день судный от Владыки и Господа помилование уллучити.

И ныне, праздника, глас 5:

Закона и пророков/ Тя, Христе, Творца и Исполнителя свидетельствоваша,/ зряще во облаце,/ Моисей Боговидец и Илиа огнеколесничник/ и неопальный небошественник/ в преображении Твоем./ С нимиже и нас Твоего просвещения сподоби, Владыко,/ пети Тя во веки.

На стиховне стихиры, глас 1.

Подобен: Небесных чинов:

Блажени есте, новомученицы соловецтии,/ яко, силою крестною себе оградивше,/ страх смерти презрели есте/ и, лукавство вражие любовию ко Христу поправше,/ мучения лютая и убиение претерпели есте./ Сего ради вас ублажаем.

Стих: Тебе ради умерщвляеми есмы весь день,/ вменихомся яко овцы заколения.

Блажени есте, страсотерпцы соловецтии,/ яко древним мучеником во страданиях подобящися,/ равную тех благодать стяжали есте/ и, кровию вашею, яко багряницею,/ Церковь Христову украсили есте./ Сего ради вас величаем.

Стих: Воскресни, Господи, помози нам,/ и избави нас имене ради Твоего.

Блажени есте, исповедницы соловецтии,/ яко от разных концев земли Российския,/ промыслом Божиим во едино место собраннии,/ едину чашу страдания испили есте/ и ныне вкупе во Царствии Небеснем радуетесь./ Сего ради вас почитаем.

Слава, глас 6:

Приидите, ублажим новомученики и исповедники соловецкия,/ иже, страдания многообразная претерпевше/ и живот свой в дар Христу Богу принесше,/ Царствия Небеснаго жители явишася,/ приемлет бо любовию Господь Свободитель/ страждущия Его ради в жизни временней/ и благодать неотъемлему дарует,/ еже молитися о нас.

И ныне, праздника, глас тойже:

Петру, и Иакову, и Иоанну,/ лучшим учеником Твоим, Господи,/ днесь показал еси на горе Фаворстей/ славу Божественнаго Твоего зрака:/ видяху бо рицы Твоя, облиставшыя, яко свет,/ и лице Твое паче солнца,/ не терпяще зрети нестерпимое Твоего сияния,/ на землю низпадаху,/ никакоже зрети могуще./ Глас же слышаху, свидетельствующ свыше:/ Сей есть Сын Мой возлюбленный,/ пришедый в мир спасти человека.

Тропарь, глас 1:

Во страданиях веру сохранивше,/ древним мучеником уподобилися есте, новомученицы соловецтии,/ и, смерть за Христа приемше,/ к жизни вечней преставилися есте,/ идеже со всеми святыми/ молитесь о душах наших.

На утрени

По 1-м стихословии седален, глас 4:

В жертву непорочную Богу принесосте себе, святии новомученицы,/ препоясани бо силою Христовою,/ ничимже отлучитесь от любве Божия./ Тем возвеличи и прослави вас Царь мира,/ единую путь крестный ко спасению всем людем показавый.

Слава, и ныне, праздника.

По 2-м стихословии седален, глас 5:

Христа в себе имуще, чада Божия явились есте, страсотерпцы,/ и, подвиг исповедания добре совершивше,/ яко светильницы пресветлии, миру просияли есте./ Сего ради, честную память вашу совершающе, песненно вас ублажаем.

Слава, и ныне, праздника.

Величание:

Величаем вас,/ святии новомученицы и исповедницы соловецтии,/ и чтим честная страдания ваша,/ яже за Христа/ претерпели есте.

По полиелеи седален, глас 5:

О, новомученицы соловецтии, крепцыи наши заступницы!/ Страдания вашими земля соловецкая паче освятися/ и Церковь Русская светло прославися./ Мы же, на подвиг и кончину вашу взирающе, со умилением взываем:/ радуйтесь, сродницы наши святии,/ пред Престолом Божиим дерзновеннии о нас молитвенницы.

Слава, и ныне, праздника.

Степенна, 1-й антифон 4-го гласа. Прокимен, глас 4: Прокимен, глас 4: Проидохом сквозе огонь и воду,/ и извел еси ны в покой. Стих: Разжегл ны еси, якоже разжизается сребро. Евангелие от Матфея, зачало 36 (10, 16-22).

По 50-м псалме стихира, глас 6:

Верностию Господу до смерти/ венец славы приясте,/ страсотерпцы достохвальнии,/ житие бо печальми и скорбьми исполнено поживше,/ радость совершенную в Бозе обретосте/ и, промыслу Божию себе всецело вверивше,/ причастницы жизни вечная явистесь./ Темже молитесь о нас ко Господу,/ да спасет души наша.

Канон мучеником, глас 8.

Песнь 1

Ирмос: Преславный в мори устроивый людем путь,/ небесное нам шествие проходимо сотвори,/ да новую песнь поим Тебе, Господи.

Припев: Господи Иисусе Христе, Боже наш, помилуй нас.

Христе, Агнче Божий,/ благодать не токмо веровати, но страдати по Тебе людем Твоим даровавый,/ даждь нам разум достойно воспети страдания новомучеников соловецких,/ да назидаются вернии их подвиги.

Якоже древле посреде моря путь людем Израильским устроивый, Господи,/ сице и ныне на островех соловецких людем Твоим посреде страданий лютых/ путь в Царствие Небесное проходимь сотворил еси,/ да воспоят Тебе песнь победную.

Припев: Святии новомученицы и исповедницы соловецтии, молитесь Бога о нас.

Приидите, празднолюбцы, память новомучеников соловецких прославим:/ сии бо, от всех концов земли Российския на островех сих собраннии,/ кровь за Христа пролиша и Церковь Русскую украсиша.

Богородичен: Избавльшеся честным Рождеством Твоим, Дево,/ адских и тленных уз и законнаго осуждения, Пречистая,/ радуйся, Обрадованная, благодарно вопием Ти,/ спасительная Двере благодати.

Песнь 3

Ирмос: Утверждей на камени веры,/ на сем созижду Мою Церковь, рекий, Господи,/ спаси мя, вопиющая:/ Ты еси, Христе, Сын Бога живаго,/ и в Тебе утвердися дух мой.

Себе отвергшеся и крест взявше,/ Христу последовали есте, страсотерпцы соловецтии,/ и, души ваша за Него положивше,/ неуываемый венец славы на Небесех прияли есте.

Каменю веры, священномучениче Петре, архиерею достохвальне,/ Воронежския земли славо и похваление,/ ты во дни страданий на островах соловецких исповеднически вопиял еси:/ Христос есть Сын Бога живаго/ и в Нем утвердися дух мой.

Столпе Православия нерушимый, красото и славо Церкви Русския, священномучениче Евгение,/ ты, старей от архиереев во узилищи соловецтем быв,/ правило веры и образ кротости юнейшим явил еси/ и Христа Бога до кончины дней твоих исповедал еси.

Богородичен: Скверну всю первыя отложивше снеди,/ животным хлебом с Небесе питаемся,/ от земли Девы возсиявшаго,/ Юже, яко Ходатаицу благих, воспоим.

Кондак и икос праздника.

Седален святым, глас 4:

Новомученицы приснопамятнии,/ вы, аще живуще, аще умирающе, выну Господеви предстояли есте/ и, души за веру Христову положивше,/ Небеснаго жительства вечную радость восприяли есте,/ обретшися яко злато негиблющее Царствия Божия.

Слава, и ныне, праздника.

Песнь 4

Ирмос: Яко Петру руку прострый в помощь,/ и мене помилуй,/ и спаси, яко Человеколюбец.

О, великий сонме новомучеников и исповедников соловецких:/ святителие и иереи, монаси и мирстии,/ старцы и юнии и жен сословие, исполнение Церкви Христовы!/ Вы, на едином поприщи страданий совокупльшися,/ едину мзду во Царствии Небеснем обретосте.

Фавор и Ермон о имени Господнем возрадовашася,/ Голгофа же Анзерская страдания земная и небесную славу новомученик проповедует./ Тии бо, горькими работы, гладом, болезнями и смертью за Христа спасение обретше,/ в горнем Иерусалиме с первомученики ликовствуют.

Архиереев русских похвало и соловецких узников доброто,/ патриаршаго чина ревнителю и лжеобновителей Церкви обличителю,/ Илларионе, священномучениче богомудрый,/ страдания о Господе и ловитву рыб со смирением приял еси, яко апостольское делание./ Ныне же и нам теплый молитвенник и предстатель пред Богом являешися.

Богородичен: Истинную Богородицу Тя вси родове родов славят,/ святейшу Ангел яве бывшу, Пресвятая Дево./ Темже вопием:/ освяти наша души, осквернившыяся страстьми.

Песнь 5

Ирмос: Утренюет дух мой к Тебе, Боже,/ зане свет повеления пришествия Твоего,/ имиже убо озари ум наш, Владыко,/ и настави на стезю жизни.

Иноцы преподобнии древле благолепием церковным острова соловецтии преобразиша,/ новомученицы же и исповедницы во дни гонений лютых/ страданьми за Христа место сие паче прославиша./ Ныне же купно Богу предстоят, молящися о обители соловецстей.

Вениамине досточудне, пастырю предивный,/ ты, соловецкия братии начальник быв,/ свидетель злодеяний и поругания обители святых явился еси./ Страдальческую же кончину от беззаконник в земли Архангельстей прием,/ мученический лик умножил еси.

Благохваление воздадим богоблаженному Никифору,/ той бо, в соловецтей обители преподобнически пожив,/ в изгнании общник Вениамину явися/ и, кончину мученическую с ним вкупе восприем,/ Царствия Небеснаго достиже.

Богородичен: Не презри, молящи о нас/ Сына Твоего, Христа Бога нашего, присно Благословенная,/ избавитися всякия скорби, Чистая.

Песнь 6

Ирмос: Бездна грехов и прегрешений буря мя смущает/ и во глубину нужднаго реет мя отчаяния:/ но Твою крепкую руку мне простри, яко Петрови,/ о Управителю, и спаси.

Во Христе страдавшие, новомученицы соловецкии,/ Церкви Православныя столпы крепцыи, яко победившии козни диавольския, явистесья,/ сего ради даровася вам имя новое и жительство в Небеснем Иерусалиме.

Во страданиях и горьких работах на островах соловецких подвизавшиися/ к покаянию и добродетельному житию подвигните нас, святии новомученицы,/ да и мы вашими молитвами сподобимся прославляти Господа во Царствии Его.

В скорбех и бедах, страданиях и тяготех темничных многолетне пребывая, святителю Афанасие, исповедниче,/ службе божественней всем сердцем прилежал еси/ и песнословие хвалебное святым земли Российския сложил еси./ Ныне же с ними, во Царствии Небеснем пребывая,/ Троицу Святую прославляеши.

Богородичен: Слово во утробе Твоей, Чистая, воплощается,/ безсловесных плотских страстей мир избавляя.

Кондак, глас 3:

Днесь престолу Божию предстоят новомученицы соловецкии/ и с небесными лики за ны молятся Богу,/ мы же, память их благоговейно совершающе, взываем:/ радуйтесь, достопоклоняемии сродницы наши,/ яко мзда ваша многа на Небесех.

Икос:

Присноблаженнии новомученицы соловецтии,/ Христу Богу верно последовавшии и мир просветившии страдании вашими,/ вы, заповеди Христовы исполнивше, блаженства Евангельская наследовали есте./ Сего ради, память вашу благоговейно совершающе, взываем вам сице:/

радуйтесь, во смирении духом Христовым обогатившиися;

радуйтесь, в Бозе утешение обретшии;

радуйтесь, землю кротких наследовавшии;

радуйтесь, оправданием Господним насытившиися;

радуйтесь, милосердием милость Божию стяжавшии;

радуйтесь, чистотою сердца Бога узревшии;

радуйтесь, мир сотворше, сынами Божиими нареченнии;

радуйтесь, изгнанием правды ради Царствие Небесное улучившии;

радуйтесь, поношения и обогания за Христа приемшии.

Радуйтесь и веселитесь, достопоклоняемии сродницы наши, яко мзда ваша многа на Небесех.

Песнь 7

Ирмос: Безумное веление/ мучителя злочестиваго люди поколеба,/ дышущее прещение и злохуление богомерзкое,/ обаче три отроки не утраши ярость зверская,/ ни огонь снедаяй,/ но противодышущу росоносному Духу,/ со огнем суще, пояху:/ препетый отцев и нас, Боже, благословен еси.

Мучителей злочестивых прещение богомерзкое презревше, новомученицы и исповедницы соловецтии,/ яко древле отроцы в пещи, во огни гонений пояху:/ препетый отцев и наш Боже, благословен еси.

Безумное веление властителей,/ еже Богу не поклонятся и не чтити Его, мужески отвергше,/ изгнания, заточения и горькия работы,/ яко часть благую, избрали есте, святии мученицы, Господу взывающе:/ препетый отцев и наш Боже, благословен еси.

Посреде мучений тяжких любовию к Богу пламенели есте, святии,/ и, мучителей злоухищрения многообразныя посрамляюще,/ со дерзновением взывали есте:/ препетый отцев и наш Боже, благословен еси.

Богородичен: Блажат Тя, Пречистая, мученический лик и мучениколюбцев собрание,/ Божие бо Слово паче ума и слова родила еси.

Песнь 8

Ирмос:Победители мучителя и пламене,/ благодатию Твоею бывше,/ заповедем Твоим зело прилежаще, отроцы вопияху:/ благословите, вся дела Господня, Господа.

Святии новомученицы и исповедницы во времена богоборческаго соловецкия отоки щедро облагодатиша,/ их бо страдании и кровию/ место мучения селение славы Господни бысть.

Прехвальне служителю Христов Аркадие,/ веры Православныя изрядный проповедниче,/ милосердием и нищелюбием Богу усердно угождал еси./ Сего ради, на многа лета во островех соловецких заточен быв,/ венец мученический от Судии Всемилоствиваго восприял еси.

Троичен: Свьше назирайте, новомученицы, память вашу любовию совершающих/ и ходатайствуйте у Трисолнечнаго Божества о прощении грехов,/ да тихое и безмолвное житие поживем во всяком благочестии и чистоте.

Богородичен: Древле Елеазару преподобному о грядущих гонениях возвестила еси, Богородице Дево,/ и Заступница Всемощная новомучеником Соловецким явилася еси.

Песнь 9

Ирмос: Разбойника подражая окаянный аз,/ исповедая Тя, зову Тебе,/ единого от Отца и от Девы неизреченно воплощенна/ и мене ради бывша по мне:/ но, яко Свет умный, Солнце,/ не вспомянув зол, во Царствии Твоем помяни мя,/ егда Судия, Господи, сядеши на Престоле.

Никодима священномученика память достойно почтим,/ иже жития преподобных соловецких состави/ и подвигом мученическим в Беле граде архипастырство свое увенча./ Сего ради белгородская земля и обитель соловецкая вкупе того прославляют.

Отче Иоанне богодухновенне,/ дни многия в заточении соловецтем пребыв,/ Христу за ны распеншуся сораспялся еси/ и в земли воронежстей смерть мученическую от гонителей приял еси./ Сего ради тя величаем.

Жизнодавче Господи,/ молитвами новомучеников и исповедников соловецких/ упокой со всеми праведными верныя рабы Твоя,/ за имя Твое на островех сих пострадавшая:/ святители и иереи, монахи и мирския,/ таже жены с девами и всяк возраст и сословие,/ ихже имена Ты Сам веси,/ яко истинныя чада и други Твоя.

Богородичен: Достойно есть яко воистину блажити Тя, Дево Чистая,/ Твоими бо молитвами всяк, исповедуя Сина Твоего, яко истиннаго Бога, утверждается/ и жизнь вечную обретает.

Светилен:

Подвиги и страдания новомучеников и исповедников соловецких/ свет Христов во тьме возсия./ Егоже и нам улучшить сподоби молитвами святых Твоих, Христе, Свете истинный.

Слава, и ныне, праздника.

На хвалитех стихиры праздника и святым, глас 8:

О, святии новомученицы соловецтии!/ Вы Господа славы всем сердцем возлюбили есте/ и Тому невозвратным помыслом последовали есте/ и, страстем Его поревновавше,/ венцы небесныя стяжали есте./ Ныне же в обителях небесных пребывающе,/ молитесь о спасении душ наших.

О, святии новомученицы соловецтии!/ Кто изочтет страдания ваша/ или кто возможет восхвалити вас по достоянию?/ Вы бо, муки многоразличныя от злочестивых восприемше,/ веру непорочну сохранили есте/ и, в Небеснем Царствии блаженство изгнанных правды ради унаследовавше,/ молитесь о душах наших.

О, страсотерпцы святии!/ Вы страдания своими древним мучеником уподобилися есте/ и, преподобных соловецких в молитве призывающе,/ долготерпению и вере их подражали есте./ И ныне, купно с ними на небесех Бога хваляще,/ молитесь о душах наших.

Слава, глас тойже. Самогласен:

Соловецтии новомученицы и исповедницы,/ святителие, священницы и праведницы,/ поминающе ныне скорбь и тесноту, страдания и слезы ваша,/ и глад, и мраз, и ужасную смерть¹,/ молим вас, молитесь о нас Господа нашего Иисуса Христа,/ да простит нам прегрешения и беззакония наша/ и помилует всех нас.

И ныне, праздника, глас тойже:

Поят Христос Петра, Иакова и Иоанна/ на гору высокоу едины/ и преобразися пред ними и просветися лице Его, яко солнце,/ ризы же Его быша белы, яко свет;/ и явишася Моисей и Илия с Ним, глаголюще,/ и облак светел осени их./ И се глас из облака, глаголющ:/ Сей есть Сын Мой возлюбленный,/ о Немже благоволих,/ Того послушайте.

¹ Аще поеши на самогласен, распев особый, прибави zde паки: Всероссийстии мученицы.

Славословие великое. Ектении и отпуст.

На Литургии

Блаженна праздника на 6, и от канона новомучеников, песнь 3-я, на 4. Прокимен праздника и новомучеников, глас 4: Святым, иже суть на земли Его,/ удиви Господь вся хотения Своя в них. Стих: Предзрех Господа предо мною выну, яко одесную мене есть, да не подвижуся. Апостол праздника и новомучеников, к Римляном, зачало 99 (гл. 8, 31-39). Аллилуриарий праздника и новомучеников, глас 4: Воззваша праведнии, и Господь услыша их,/ и от всех скорбей их избави их. Стих: Многи скорби праведным, и от всех их избавит я Господь. Евангелие праздника и новомучеников от Луки, зачало 105-106. Конец: В терпении вашем стяжите душа ваша: (гл. 21, 8-19). Причастен праздника и новомучеников: Радуйтесь, праведнии, о Господе, правым подобает похвала.

Молитва

О достохвальнии и великоименитии новомученицы и исповедницы соловецтии! Вы гонения, хлад, глад, наготу, поношения, поругания и ярость мучителей со смирением претерпевающе, веру твердую, упование непосрамленное и любовь истинную к Богу, ближним и гонителем вашим явили есте.

Сего ради ныне, предстояще Престолу Владыки Христа, молитесь о благостоянии святыя Церкви Русския, да избегнет гонений, расколов, ересей, распрей и мятежа мирскаго, да восприимет архипастыри и пастыри добрая, пекущаяся о спасении душ, да украсится иноки честными, старцы мудрыми, мужы добронравными и девы чистыми, во еже в мире глубоце тихое и безмолвное житие поживем во всяком благочестии и чистоте.

Аще же приидет и наш час пострадати за веру Православную, утвердите ны, недостойныя сродники ваша, в терпении, даруйте нам мужество и крепость исповедати пред человеки Христа, истиннаго Бога, да сподобимся с Вами воспевати пречестное и животворящее имя Отца и Сына Святаго Духа ныне и присно и во веки веков. Аминь.